

Nov dachasa per la cultura grischuna

grischunCULTURA online

■ **(anr/fa) A moda cumplessiva infurmescha la plattafurma d'internet quadrilingua grischunCULTURA davart organizaziuns ed occurrenz culturalas en Grischun. Er ils artists vegnan preschentads.** «Cun agid da la plattafurma d'internet grischunCULTURA duai vegnir rendi enconuscent il spectrum multifar da la cultura grischuna», ha declerà venderdi passà cusseglier guvernativ *Claudio Lardi* a Cuira a chaschun da la preschentaziun da la nova purschida da ses departament, «sajan quai emnas da festa, open airs, represchentaziuns da musica u da teater sco er la cultura architectonica singulara ed ils museums.» Dapi venderdi èn quellas infurmaziuns accessiblas per persunas indigenas u er giasts da vacanzas en furma simpla e concisa, «sco en in cudesch da branschas cun commentari», ha ditg il suprastant dal departament d'educaziun, cultura e protecziun da l'ambient. Ch'i saja per bieras persunas che lavuran sco artistas, musicistas u teatristas zunt impurtant ch'ellas possian sa preschentar permanentamain er ordaifer las exposiziuns e represchentaziuns, ha'l manegià, «e sin grischunCULTURA pon ellas ed els far quai».

En stretga collavuraziun cun Grischun vacanzas

Charlotte Schütt, la responsabla

per il marketing cultural da l'Uffizi da cultura chantunal, ha preschentà la nova purschida: «Las infurmaziuns ch'ins chattà en nossa plattafurma derivan da las persunas che lavuran sin il champ cultural sco er da las organisaturas ed organisaturs d'occurrenz culturalas», ha ella explitgà, «els tuts pon endatar lur infurmaziuns directamain davent da l'agen computer sin la banca da datas.» Per concepir e realisar grischunCULTURA han ils respunsabels collavurà stretgamain cun l'organisaziun Grischun vacanzas: Uschia è integrà grischunCULTURA en il portal grischun «www.graubuenden.ch». A partir da proxima primavaira duain sco ch'ella ha cuntinuà vegnir colliadas las datas da las occurrenz da maniera ch'ellas ston – «sche pussaivel» – vegnir endatadas mo in giada en in lieu.

Minimar collisiuns da terminis tant sco pussaivel

grischunCULTURA porscha a las participantas e participants er servetschs supplementars sco instruments per crear ina homepage ubain simpels moduls da programmaziun. «Uschia pon els mussar sin l'atgna pagina d'internet las occurrenz ch'èn vegnidas inscrites en la plattafurma», ha ditg *Charlotte Schütt*, «planisà èsi er da stgaffir in sectur betg public nua che las datas d'occurren-

zas provisorias pon vegnir inscrites, cun la finamira da minimar collisiuns da terminis.» In'ulteriura etappa da complettaziun èn infurmaziuns e links a la cultura architectonica dal Grischun, sco per exempel infurmaziuns davart la claustra da Müstair u la Sunnibergbrücke.

Plattafurma vegn a crescer permanentamain

grischunCULTURA è in servetsch dal chantun Grischun che vegn a crescer durant ils proxims mais ed a porscher adina dapli infurmaziuns. La pagina d'internet è vegnida messa online pir venderdi passà, perquai è il dumber d'endataziuns anc restrenschì. «Jau sun persvas che nus purschain in bun servetsch tant a las persunas activas sin il champ cultural sco er a quellas ch'èn interessadas en la cultura», ha ditg *Claudio Lardi*, «perquai vegn quel dumber a s'augmentar spert.» *Flavia Kippele*, la manadra da l'uffizi da cultura, ha preschentà las cartolinas novcreadas en rumantsch, tudestg, talian ed englais. «Las cartolinas ch'ins survegn tar ils biros turistics, tar visitas en museums sco er a la cassa da concerts e teater», ha ella ditg, «duain render attent a nossa nova purschida online.»

L'adressa da la plattafurma d'internet da la grischunCULTURA è www.grischuncultura.ch.



Charlotte Schütt (san.), Claudio Lardi e Flavia Kippele han preschentà la nova purschida da grischunCULTURA sco er las cartolinas quadrilinguas.